

# COMUNU DE MÒGORU

## PROVÌNTZIA DE ARISTANIS



# REGULAMENTU

# CONSULTA CULTURA

Aprovau cun delibera de su Consillu Comunali n. **25** de su **05/05/2011**

## *PRINCÌPIU ISPIRADORI*

Su Comunu de Mòguru, in logu de is funtzionis suas chi ponint in contu de avalorai is formas liberas de assòtziu, scerat in sa Consulta Cultura s'aina futa po favoressi e coordinai initziativas capassas de ndi pesai politicas de svilupu de sa cultura, de connoscèntzia e avaloramentu de su territòriu e de sa comunidadi, de is fainas de arrecreu e de su tempus liberu.

### *Art. 2*

#### *ISTITUTZIONI DE SA CONSULTA CULTURA*

1. S'est istituida, in su Comunu de Mòguru, sa 1<sup>u</sup> Consulta Cultura.
2. Sa Consulta est apartitica, est a caràteri voluntàriu, non tenit punnas de lucru e pigat sa cultura comenti a connoscèntzia de sa realidadi in totu is facis suas.

### *Art. 3*

#### *PUNNAS*

Sa Consulta chi est in s'art. 2, est una Mesa anca si setzi po arraxonai apari Amministratzioni Comunali e Assòtzius chi traballant in fainas culturalis, educativas, de arrecreu e de su tempus liberu. Est un'organismu cun s'incàrrigu de donai consillus e fai propositas, cun chi su Comunu avalorat e favoressit sa partecipatzioni de organizzatzionis liberas chi traballant in fainas po sa genti cali si siat s'edadi.

Sa Consulta proponit e traballat a manu de pari po ndi pesai initziativas po favoressi s'integratzioni e s'acàpiu intra de s'Amministratzioni Comunali e is assòtzius a caràteri locali, sa Scola, sa Biblioteca Comunali e is àterus organismus consultivus.

### *Art. 4*

#### *TAREAS E FAINAS*

Sa Consulta tenit sa tarea de:

- a) favoressi su càmbiu apari de novas intra de Assòtzius e Amministratzioni Comunali
- b) fruniri elementus de avaloramentu chi serbint a programmai initziativas e interventus;

Sa Consulta sighit custas linias de interventu:

- a. Favoressimentu de fainas chi pertocant a s'istrutzioni, a sa formatzioni e a sa educatzioni sòtziu-culturali e ambientali.
- b. Favoressimentu de is fainas de arrecreu e de su tempus liberu.

### *Art. 5*

#### *COMENTI EST CUMPOSTU*

Arrispetendi is princìpius de democraticitadi e de arrapresentatividadi podint pigai parti totu is assòtzius, grupus, comitaus o consillus arrapresentativus chi funt in

s'art. 3 de acoa chi traballant in su territòriu de su Comunu de Mòguru, chi faint inìtziativas a bantàgiu de sa populatzioni de su Comunu o comentis si siat de importu o utilesa pùblica.

A sa Consulta ddi fait a presidenti su Sìndigu o unu delegau suu e est fata aici:

1. presidenti -o delegau- de ònnia Assòtziu chi de sei acetat de s'arrapresentai, iscrita a manera regulari in s'Albu Comunali de is Assòtzius.
2. Un'arrapresentanti de ònnia òrdini de scola chi is istitutus scolàsticus de Mòguru inditant;
3. N. 2 arrapresentantis de su Consillu Comunali, unu de sa majoria e unu de sa minoria;
4. Arrapresentantis de àterus assòtzius o sugetus privaus chi traballant in su setori, mancai non funt arreconnotus a manera formali, chi traballant me in is setoris de cumpetèntzia de sa Consulta Cultura.
5. Dipendenti comunali de su servìtziu bibliotecàriu chi at a fai finas is funtzionis de segretàriu de sa Consulta.

Sa Consulta podit tzerriai a pigai parti a is atòbius, sena de deretu de votu, personis e assòtzius cun interessus aposta cunforma a is argumentus in s'òrdini de sa dii de s'atòbiu.

Su Segretàriu tenit s'incàrrigu de sterri verbali de is atòbius de sa Consulta e de atendi a is organismus naus in antis me in is fainas chi ndi bessint de is assinnamentus chi ddis ant donau.

#### *Art. 6.*

#### *FUNZIONAMENTU*

1. Su Presidenti disponit sa cunvocatzioni - de norma, ònnia cuatru mesis - de sa Consulta e fait s'òrdini de sa dii; sa segreteria de sa Consulta aprontat totu is documentus chi abisòngiat po sa discussioni e ndi sterrit is verbalis suos.
2. Sa Consulta podit spartziri is traballus po discussionis a tema.
3. Is atòbius ballint cali si siat su nùmeru de is chi ddui funt de is chi ndi tenint deretu.
4. Is inditus chi narat sa Consulta funt bàllidus candu ddui aprovat sa majoria sèmprici de is chi ddui funt de is chi ndi tenint deretu.
5. Su Presidenti arrapresentat sa Consulta me in is raportus allenus e donat comunicaus a nòmini e po contu de cussa etotu.

#### *Art. 7.*

#### *DURADA*

Sa consulta abarrat in càrriga totu cantu andat sa legisladura.

Acontessendi de acabbai sa càrriga de unu consilleri comunali chi ndi fait parti po dimissionis o àtera arraxoni s'incarrelat a ddu arrempratzai cun àteru nominativu de arrapresentàntzia aguali.

Apustis de ai fatu tres ausèntzias de sighida sena de ddas giustificai, su consilleri comunali chi ndi fait parti at spaciau e s'at a depi rempratzai segundu a su chi narat su comma de acoa.

*Art. 8.*  
*ÒNERIS*

Su funtzionamentu de sa Consulta no ingendrat òneris a càrrigu de su Comunu.